

BOSNA I HERCEGOVINA
FEDERACIJA BOSNE I HERCEGOVINE
JAVNO PREDUZEĆE
NACIONALNI PARK „UNA“ d.o.o.

Broj: 01-0840/24

Bihać, 08.04.2024.godine

Na osnovu člana 100. stav (3) Zakona o javnim nabavkama Bosne i Hercegovine („Službeni glasnik BiH“, broj: 39/14 i 59/22), rješavajući po žalbi potencijalnog ponuđača Univerzitet u Sarajevu – Prirodno matematički fakultet, zaprimljenoj 05.04.2024.godine, izjavljenoj na tendersku dokumentaciju za *Nabavku usluge izrade ribarstveno – gospodarske osnove za vodotoke na području Nacionalnog parka „Una“*, za koje je objavljeno Obavještenje o javnoj nabavci broj: 1127-7-2-31-3-14/24 od 29.03.2024.godine, Ugovorni organ – v.d. direktor JP Nacionalni park „Una“ d.o.o. Bihać *donosi*

R J E Š E N J E

Usvaja se žalba potencijalnog ponuđača Univerzitet u Sarajevu Prirodno – matematički fakultet, zaprimljena 05.04.2024.godine, izjavljena na tendersku dokumentaciju broj: 01-0755/24 od 29.03.2024.godine, u postupku javne nabavke usluga izrade ribarstveno – gospodarske osnove za vodotoke na području Nacionalnog parka „Una“, za koje je objavljeno Obavještenje o nabavci broj: 1127-7-2-31-3-14/24 od 29.03.2024.godine.

Ovo Rješenje je osnov za preduzimanje radnje ispravljanja od strane ugovornog organa i izmjenju tenderske dokumentacije broj: 01-0755/24 od 29.03.2024.godine.

Ugovorni organ će o preduzetoj radnji izmjene tenderske dokumentacije obavijestiti sve potencijalne učesnike u postupku, te će ovo Rješenje biti objavljeno na web stranici Ugovornog organa (www.npuna.com).

Ovo Rješenje stupa na snagu danom donošenja.

O b r a z l o ž e n j e

Ugovorni organ – JP Nacionalni park „Una“ d.o.o. Bihać je na osnovu Odluke broj: 01-0737/24 od 28.03.2024.godine pokrenulo postupak javne nabavke usluga izrade ribarstveno – gospodarske osnove za vodotoke na području Nacionalnog parka „Una“, te je dana 29.03.2024. godine na Portalu javnih nabavki objavljeno Obavještenje o nabavci broj: 1127-7-2-31-3-14/24 i Tenderska dokumentacija broj: 01-0755/24.

Ugovorni organ – JP Nacionalni park „Una“ d.o.o. Bihać je dana 05.04.2024.godine zaprimio žalbu na tendersku dokumentaciju, uloženu od strane potencijalnog ponuđača Univerzitet u Sarajevu Prirodno – matematički fakultet.

Ugovorni organ – JP Nacionalni park „Una“ d.o.o. Bihać je utvrdio da je žalba blagovremena, dopuštena i izjavljena od ovlaštenog lica.

U svojoj žalbi potencijalni ponuđač Univerzitet u Sarajevu Prirodno – matematički fakultet navodi sljedeće:

Na osnovu člana 101. Zakona o javnim nabavkama Bosne i Hercegovine („Službeni glasnik Bosne i Hercegovine“, broj: 39/2014 i 59/2022) , podnosimo žalbu na tendersku dokumentaciju za **Nabavku usluga izrade ribarstveno – gospodarske osnove za vodotoke na području Nacionalnog parka „Una“, u dijelu tenderske dokumentacije:**

3.4. Tehnička i profesionalna sposobnost, tačka 3.4.1 Definisani uslovi vezano za tehničku i profesionalnu sposobnost ponuđača stav a) u kojem se navodi da ponuđač treba imati na raspolaganju, tokom trajanja izvršenja ugovora, sljedeće osobe potrebnih obrazovnih i stručnih kvalifikacija i to:

Voditelj projekta – 1 izvršilac sa najmanje završenim VIII stepenom stručne spreme iz oblasti biotehničkih nauka, sa radnim iskustvom od minimum 10 (deset) godina i učešćem u minimum 5 (pet) projekata sa temom izrade ribarske osnove ili revizije ribarske osnove;

Saradnik na projektu – 1 izvršilac sa najmanje završenom visokom stručnom spremom II ciklusa studija iz oblasti biotehničkih nauka, sa radnim iskustvom od minimum 3 (tri) godine i učešćem u minimalno 2 (dva) projekta sa temom izrade ribarske osnove ili revizije ribarske osnove.

Želimo istaknuti da Zakon o slatkovodnom ribarstvu („Službene novine Federacije BiH“ broj: 64/04) u članu 12. navodi sljedeće:

Ribarska osnova sadrži:

1. osnovne hidrološke, biološke, fizičke, hemijske i druge karakteristike voda ribolovnog područja;
2. sastav ribljeg fonda po vrstama (kvalitativno i kvantitativno);
3. mogućnost i način prirodnog i vještačkog prirasta ribljeg fonda po vrstama riba;
4. mjere za gajenje, zaštitu i lov riba i životinja kojima se ribe hrane;
5. mogućnost privrednog ribarstva i ulova rakova;
6. mjere za zaštitu ribljeg mrjestilišta, riba i riblje ikre sa plavnih područja;
7. mjere za otkrivanje i suzbijanje zagađivača voda ribarskog područja;
8. uslove obavljanja sportsko-rekreacionog ribolova i mjere za unapređenje sportsko-rekreacionog ribolova i ribolovnog turizma na ribarskom području;
9. organizaciju ribočuvarske službe;
10. program poribljavanja (vrijeme, količina i vrste riba);
11. sredstva potrebna za sprovođenje ribarske osnove i način obezbjeđivanja tih sredstava.

Iz sadržaja istaknutog člana 12. („Službene novine Federacije BiH“ broj: 64/04) je eksplicitno navedeno da je potrebno analizirati hidrološke, biološke i fizičke karakteristike voda. Osim sve aspektne analize ihtiofaune, biološke karakteristike minimalno uključuju još i analize fitobentosa i zoobentosa jer se istima osigurava uvid u prehrambeni potencijal vodotoka. Navedene analize predstavljaju dio obrazovnog programa koji se realizira na visokoškolskim obrazovnim ustanovama koje imaju studijski program iz Biologije. Biotehnički ili Poljoprivredno – prehrambeni fakulteti u svojim studijskim programima nemaju relevantno obrazovanje koje osigurava potrebno znanje za realizaciju navedenih egzaktnih bioloških istraživanja ihtiofaune.

Sličan zaključak se može izvesti i za aspekte proučavanja i analiza hidroloških, fizičkih i hemijskih karakteristika voda koje spadaju u domen fizičkogeografske nauke. Konkretnije, da bi se mogle obezbijediti relevantne hidrološke, fizičke i hemijske analize voda u sastavu ekspertnog tima mora biti uključen ekspert iz oblasti fizičke geografije.

Navedeni zahtjev je u potpunosti u skladu i sa Okvirnom evropskom direktivom o vodama (2000/60/EC), odnosno ispunjavanjem navedenih uvjeta obezbjeđuje se usklađenost ppostignutih rezultata istraživanja sa odredbama ove Direktive, što ima presudan značaj i za aplikaciju rezultata Ribarske osnove za daljnja naučna istraživanja.

U slučaju pomora riba, veće od jedne trećine ihtiomas procijenjene ribarskom osnovom, mora se obaviti revizija ribarske osnove.

Uvažavajući istaknute činjenice, ponuđač treba da je kadrovski osposobljen za izvršenje predmetnih usluga, utvrđenih i specificiranih u ovoj tenderskoj dokumentaciji, odnosno, da ima na raspolaganju tokom trajanja izvršenja usluga sljedeće osobe potrebnih obrazovnih i stručnih kvalifikacija, i to:

Ekspert 1 – minimalno 2 izvršioca, najmanje završena visoka stručna sprema II ciklusa studija iz oblasti biologije, sa radnim iskustvom od minimum 5 (pet) godina na poslovima ihtioloških istraživanja na površinskim vodama i učešće u minimalno 2 (dva) projekta sa tematikom ihtioloških istraživanja;

Ekspert 2 – 1 izvršilac, najmanje završena visoka stručna sprema II ciklusa studija iz oblasti biologije, sa radnim iskustvom od minimum 5 (pet) godina na poslovima istraživanja makroinvertebrata vodenih ekosistema i učešćem u minimalno 2 (dva) projekta sa tematikom istraživanja makroinvertebrata vodenih ekosistema;

Ekspert 3 – 1 izvršilac, najmanje završena visoka stručna sprema II ciklusa studija iz oblasti biologije, sa radnim iskustvom od minimum 5 (pet) godina na poslovima botaničkih istraživanja vodenih ekosistema i učešćem u minimalno 2 (dva) projekta sa tematikom botaničkih istraživanja vodenih ekosistema;

Ekspert 4 – 1 izvršilac, najmanje završena visoka stručna sprema II ciklusa studija iz oblasti fizičke geografije, sa radnim iskustvom od minimum 5 (pet) godina na poslovima fizičko geografskih istraživanja i učešćem u minimalno 2 (dva) projekta;

Minimalan broj ključnog osoblja za realizaciju posla koji je predmet ove javne nabavke iznosi 5 (pet).


Ribarsku osnovu, kao i njenu reviziju, izrađuju pravna lica iz člana 48. Zakona o slatkovodnom ribarstvu („Službene novine Federacije BiH“ broj: 64/04).

Uvažavajući istaknute činjenice predlažemo izmjenu/dopunu tenderske dokumentacije za navedeni predmet nabavke u tački 3.4.11 stav a) Definisani uslovi vezano za tehničku i profesionalnu sposobnost ponuđača, odnosno da se uvrsti minimalno 5 (pet) osoba za realizaciju posla koji je predmet nabavke, potrebnih obrazovnih i stručnih kvalifikacija.

Ugovorni organ – JP Nacionalni park „Una“ d.o.o. Bihać je razmotrio uloženu žalbu, te žalbene navode žalitelja ocijenio kao osnovane, zbog čega je u skladu sa odredbom člana 100. ZJN, odlučeno kao u dispozitivu.

Postupajući po žalbi i djelujući u skladu sa navedenim članom ZJN, Ugovorni organ – JP Nacionalni park „Una“ d.o.o. Bihać donosi rješenje o usvajanju žalbe u cijelosti i istovremeno preduzima radnju ispravljanja na način da će izmijeniti tendersku dokumentaciju u skladu sa navodima iz žalbe.

Pouka o pravnom lijeku: Protiv ovog rješenja se može izjaviti žalba Uredu za razmatranje žalbi BiH, putem Ugovornog organa direktno, elektronskim putem ili preporučenom poštanskom pošiljkom u roku od 5 (pet) dana od dana prijema Rješenja.


v.d. Direktor
Amarildo Mulić

Dostaviti:

1. Univerzitet u Sarajevu Prirodno–matematički fakultet
ul. Zmaja od Bosne 33-35, 71 000 Sarajevo;
2. U spis,
3. a/a.